

ab aliis facile discernunt gemmarum mangones. E fodinis eruuntur aurum velut, quibus vero locis ad altitudinem stature hominis eruti fuerunt, iisdem post tres quatuorve annos novos recensque natos reperire est.

*Malabar.* Malabar à Promontorio de Rama initium suum capit, à Goa distans austrum versus miliaribus 10, excurritque usque ad Promontorium de Comori, finem continentis. Ad littus hæ jacent civitates: Onor, Barfalor, Mangalor, Cananor, Cranganor, Cochin, & Caulam, ubi arces sunt, & præsidia habent Lusitani. Calicutium metropolis est, sedesque Cæsaris, quem Samoryn appellant, qui hinc longe lateque jura dicit. Verum ex quo istic rerum potiri cœperunt Lusitani, retro sublapso est urbis fortuna, dignitasque, ut jam veteris urbis vix quicquam præter nomen habeat. Omnibus supradictis locis piper crescit, prope Cochin cinnamum, sed vilius, quod vocant Canellam de matte, hoc est, cinnamum agreste. Naves è Portugallia Goam appellant, ubi postquam exonerarunt merces, oram hanc legunt, mercesque recipiunt alias, maxime in urbe Cochin, quæ magnitudine non multo inferior est Goa. Plusculum à mari mediterranea versus rex istorum moratur, in loco, quem Cochin Dacima vocant qui ad territorium spectat Malabarum. Sunt autem Malabares coloris atrii & picei, capillis lævibus & nigris, verum corporis figura non absimili Europæis. Ingenio sunt atroci, animo audaces, superbi, militum quos India habet fortissimi, hostes infensissimi Lusitanorum, idololatria superstitionibusque reliquis Indis non absimiles. In duo dividuntur hominum genera: Nairis & Polias. Nairis nobiles sunt, militiæque dediti, quibus mos perforare pendulas aurium particulas, quas extendunt humeros usque, ad formam elegantiamque. Polias agricolæ sunt, piscatores, opificesque, genus hominum vile & despectum, si cum Nairis compares.

*Narsinga.* A Capite de Comori orientem versus, regnum Narsinga occurrit, quod à Negapatana ad Musilopatan usque extenditur. Cujus Rex Bisnagar appellatur, mutuato vocabulo à metropoli regni, quæ in mediterraneis est, ubi dicti Regis est sedes. Littori adjacet civitas S. Thomæ, quam Lusitani incolunt, olim potentissima & Malliapor appellata. Referunt Indi, hic docuisse S. Thomam Apostolum, miraculisque gentes convertisse. Quin & hoc affirmant, cum primum in has terras venissent Lusitani, superstites adhuc fuisse Christianos, oriundos ex Indis ad Christianismum à D. Thoma conversis.

*Orixa.* Orixa sita est ad Boreale latus Narsingæ, seque extendit orientem versus, Gangem usque. Omnis autem hic littoralis tractus Narsingæ, Bisnagar, & Orixa à Negapatana usque ad Gangem sive Bengalam, communi vocabulo vocatur Ora de Coromandel. Aere regio fruitur saluberrimo, abundatque annonæ omnis copia. Vestes hic Indicæ, præsertim in urbe

S. Thomæ, necnon panni ex gossipio conficiuntur variis distincti pictique coloribus, intercurrentibus filis aureis, argenteisque, ut precio ipsas vestes sericas excedant. Hæ pro mercibus istic sunt, & quaquaversum in omnes orbis partes, nostramque adeo Europam, distrahuntur.

*Bengala.* Bengala latus orientale terminat Ganges, occidentale regnum Pegu. Ganges ex maximis est terræ fluminibus. Indis sacer habetur, quique ejus se undis abluerit, ei peccata omnia remissa esse confidunt: qui vero ablui non cupiet, spe salutis excidisse. quam ob causam magna ad eum frequentia confluere solent incolæ, variisque superstitionibus & ceremoniis defungi. Metropolis regni est Chatigam. Mira hic rerum omnium ad vitæ sustentationem necessariarum proventus, præsertim oryzæ, quæ infinitæ naves onerantur, nec pecorum hic aviumque penuria, sed vis maxima, ita ut bos precio Larini, hoc est, decem assibus nostratis pecuniæ veneat; & oryzæ mensura, quatuordecim capiens Hollandicos modios, quindecim assibus. Etiam pari pro rerum discrimine precio haberi possunt oves, gallinæ, saccarum, butyrum, aliæque esculenta & poculenta. Etiam hic panni ex gossipio conficiuntur plurimi. Fila hic nent, ex herba quadam flavi coloris, quam herbam Bengalem vocant, unde pannos texunt & lintea sericis præstantiora. Rhinocerotus alit plurimos, hostes elephantorum, quorum, rhinocerotum puta, cornu, dentes, carnes, sanguis, ungulæque antidota adversus venena esse creduntur.

*Aracam & Pegu.* Regna Aracam & Pegu ab occidente Bengala terminantur, ab ortu regno Siam. Gemmis auroque abundant, sapphiris, carbunculis, granatis, aliisque. lacca sigillaris hic loci etiam conficitur. Elephantorum nusquam major, quam hic, numerus. Quoties huc adventat peregrinus mercator, querunt, num diutius istic morari animus ipsi sit. quod cum intellexerint, offerunt ipsi virgines plurimas, è quibus, quæ placuerit maxime, eligit, deque precio cum amicis transigit, hæc illi pro ancilla & uxore est, ministeriisque domesticis fungitur. Discessurus eam ad amicos remittit, preciumque promissum solvit. Quod si illa, absente peregrino isto, nubat, reuertaturque idem peregrinus, solvitur tantisper matrimonio, & ad peregrinum, cui antea devincta fuerat, redit, eique inservit, donec discedat, acquiescente. cui nupta fuerat, marito, ad quem postmodum salvo honore & pudicitia redit. In civitate Martavan quæ ad australe est latus Pegu, ollæ fictiles conficiuntur, quas Martavanas vocant. Tantæ sæpe sunt magnitudinis, ut duo vini dolia capiant. In iis aquæ, oleum, vinaque asservantur.

*Siam.* Regnum Siam ab occasu regno Pegu terminatur, ab ortu Cambodia. Rex est potentissimus: potentior olim, quin ex potentissimis Orientis regibus. Subditos imperio suo habuit non solum regni